

# Mud Volapüka

Nüm 31

18 novul 2016

---

## Rubrig gramatik

### Vi

Lintelek „vi“ binon vokäd säspetikama, lieda:

**vi!** misek, säspetikam kion!

### Vio

Ladvärb tefik „vio“ jonon vemi u modi duinama bosa e gespikon säki „lio?“:

*liomödotik (lio mödoto) fidol?* = mafoti *kinik* fifidol ünü del lolik?  
(säk)

mafoti *kiomödotik (kio mödoto) fifidol ünü del lolik!* = fidol *so* mödiko! (lintelek)

odajonob ole **vio** *mödoto* fidob = odajonob ole **gretoti** *mafota keli* fidob (vem)

otidob oli **vio** *mödoto* fidob = odajonob ole **modi** ad fifidön mafoti *so mödik* (mod)

dasevob **vio** *vemo (ritiko)* löfol ofi = dasevob **viovemo** löfol ofi = dasevob **gretoti** löfa olik kol of (kelos binon *(le)vemik*)

## Vo

Ladvärb „vo“ sinifon „(atos) binon verat das ...“.

pod at binon grünik, **vo**-li? = **veratiko**-li, das pod at binon grünik?  
= pod at binon-li grünik?

**vo**, pod at binon grünik = **si, atos binon verat das** pod binon grünik

## Vü

Präpod „vü“ jonon das bos papladon in spad pemiedüköl fa yegs anik (mödadilo fa telat) votik:

dom obik papladon **vü** doms hiela „Peter“ e hiela „Karl“ = dom obik papladon *detao de (kol)* dom hiela „Peter“ e *nedetao de (kol)*  
dom hiela „Karl“ = dom obik **diton** domis hiela „Peter“ e hiela „Karl“  
vebön **vü sil e taled** = vebön in lut **sus taled e dis sil**

enepubom ini lupöp (lusog) **vü mens mödik** = enepubom ini lupöp (lusog) **bevü mens mödik** = enepubom ini **zenod (zän)** lupöpa **pezüöl fa mens mödik**

## Vüo

Ladvärb „vüo“ sinifon „ün tim ot“:

äseadob näi vitür ed äredob buki; **vüo** stels balid eprimikons pubön pö sil = äredob buki näi vitür; **ün tim ot (ottimo)** stels balid eprimikons pubön pö sil = stels balid eprimikons pubön pö sil (**ün tim ot) ven** äreidob buki

## Vüö

Lintelek „vüö“ pagebon as vöd bipükik (büküpetik) fo nün zuik e sinifon „zuo ...“:

pod at binon benosmekik (nün ledinik); **vüö!** binon i vemo frutik danädü vitamins (nün zuik) = pod at binon benosmekik (nün ledinik); **zuo, vilob küpetön das** binon i frutik (nün zuik) = pod at binon benosmekik **ä** frutik = **bevü votikos**, pod at binon i frutik = **vüö!** pod at binon i vemo frutik, no te benosmekik

## Ya

Ladvärb „ya“ jonon das jen semik ijenon büo:

iremop buki ot (at) **ya**, klu no uremop uti dönu = iremop buki ot **büo**

ven ekömob su stajon, tren **ya** idetävon = tren idetävon **bü(büäto)** ekömob su stajon = tren idetävon **gölikumo ka** ekömob su stajon = elatikob ad tren


## Ye

Ladvärb „ye“ sinifon „ab ...“, „too ...“ e sinifon das jenofot zuik dabinon kel taon lepüki ledinik u lüblinon pläoti:

löfob podis, **ye** no löfob utis redik = löfob podis, **ab(too)** no löfob utis redik = löfob podis valik **plä** redik

ekömob su stajon, **ye** tren ya idetävon = ekömob su stajon, **ab** tren ya idetävon

# Sevols-li, das ... Kamerunän



1) Repüblik Kamerunänik binon län tö Zänoda-Frikop. Melans Portugänapükik, as Yuropans balid kel irivons jolis läna, inemons oni Portugänapüko „Rio dos Camarões“ („Flumed krevätas“, kel ivedon „Cameroon“ Linglänapüko e „Cameroun“ Fransänapüko) bi isetuvons lemödoti krevätas in flumed topik.

2) Püks calöfik Kamerunäna binons Linglänapük e Fransänapük. I püks ze 1738 pepakons tö län, keli suvo nemoy eli „Frikop smalik“ demü distöf taledavik e kulivik ona. Su topäd at ziläks klimatik e glofotik valiks komons kels binons kaladik pro Frikop. Ze laf sürfata läna pabeglofon fa fots in kels kanoy logön bidis vütropänik valiks bimas, bevü kels pam, köalüpt ä bim bodepafrutik binons kaladikün. De nolüd jü sulüd densit glofotas pluikon. Su klivs volkana el „Kamerunän“ fots laidagrünik glofons, pla kels pianiko yebaläns belik glofotik plaikons. Ve jol valik luglofots(natädöps) mangrovik tenikons.

3) Belödans plu laf Kamerunäna lifons donü nivod pöfa to getot mö dolars 2300 a yel pro men bal, das binon vemo gretik pö Frikop. Atos pasüükon fa neleig gretik sogä.





4) Kamerunän binon topät luimöfikün Frikopa e telid bevü uts tala. Zänedo mimmets za 9655 reinons is a yel.

5) Kamerunän labon kvipis futaglöpädik netik fol e leduton lü läns futaglöpädikün.

6) Kamerunän binon motedalän kanitana jiel ,Irma Pany’.



Säkis, küpetis e lofotis aliks ä materis e volanuns nitediks kanols lüsedön lü penedabog «[komunan@yandex.ru](mailto:komunan@yandex.ru)».